


Iischi Schpraach

Darum git s «Bäräfrässär» und «Rossschintini»

Hite teerffe wer wider emaal der Tony Lagger us Reckige! Gettnau LU keere. Är erinneret embizz a di Zit, waa im Goms no Bära gsii sind.

Dr Tony het naa dm Leerseminaar z Sitte an der Universitäät Friburg ds Sekundarleererdiplom gmacht, de öi im Oberwallis Schüel ggä und het 30 Jaar als Schuelleiter, Leerer und in der Gschäftsleitung im ä greessere sozialpädagogische Inschtitut im Kanton Lüzärä gschafft. Im Summer ischt är aber immer in schiiner Heimat Goms anzträffe. Vor churzem het är mit dem Bernhard «Gioco» Schmid das hibsch Büech «Hinä gää mär z Aabäsizz» üssaggä. Öi hite scheicht är iisch schpannendi Aabäsizzgschichte. Äs ischt ä Freid, im z losel. Also:



Tony Lagger,
Reckingen/Gettnau



Hobachji mit där Bäräschlüächt uf där linggä Bachsitä.



Där Bära

GRAFIK VON BARBARA SEILER

WB, 11.12.2020/1

FOTOS ZVG

«Bevor mä düäzämaal z Alp gfarä ischt, het mä z eerscht nu äs paar Täg i nä Weidä ghiätä. Daa, i nä Voralpä het mä de ds Loschii kä, gschaffät, gchääsät und gläbt. Und gliichärmaassä de wi-där im Herbscht, wa mä va dä Alpä zrugg ins Taal grobat het. Äs git ä hüüffä Üfsaartä bi insch im Goms. Rund um Reckigä sind das «Äbmetè», «Bii-nä», «Jungholz», «Eggä», «Ofnä», «Wi-lär» und nu ä schuppä mee. Und jedäs het so schini eigädä und schpeziellä Saagä, Gheimnis, bsunnärbari Zellätä, unerklärlichi Erläbnis und uheimli-chi Gschichtä. Di Täg da obänna heint än feschtä Ablöiff kä: Ma het ghiätä obäm Hag, ischt am Aabänd zrugg zär Hittä, het gmolchä, Holz gschpaaltät, Ruppä gschnäzzät, aagfirät, gkääsät, Bullärä ggässä und wa schliessli däri Zigär inär Zigärblächchä am Dachrafä ghangät ischt, het mä schich um dä Tisch gsezzt und Zigärsüüffä gleffiät. Und ab und züä het mä bi mä Naach-püür zum Aabäsizz abgmacht. Daa het mä ubär d Aarbeit värzellt, ds Niwwsch-tä üsäm Dorf üstiischät, abär ö bsun-närbari Gscheenis und Begäggngä zum Beschtä ggä. Ich bsinnä mi nu güät an di Gschichtä vo dä Bärä uf Äbmete und i nä Eggä, wa däri Onkäl Leo insch värzelt het.

Än Bärä ischt uf däri Fiezi

Va Italiä und däm Tessin har sjää sch ins Goms i gwandärat. Z alläreerscht ins Geeratal bi Obärwaald, düä het mä däri Bärä im Blasä und inär Äginä bi Üärlichä ärlickt, und schpäätar witär appä bi Reckigä wan är äs paar Schaaaf z toot bissä het. D Nachricht ischt durch s ganzi Goms: «Än Bärä ischt uff däri Fiezi!» Üs värschidänä Gmeindä sint Lit zämä cho und ma het än gjagt, odär wiä mä düäzämaal het gseit, än Ruer väraschtaaltät. Üs däm ganzä Obärä Zeendä heijä schich d Lit värsammlät, Jung und Alt, Mannä und Fröuwä, nit säältä sogar mee als äs paar hunnärt Persoonä. Hosäschissär, Angschthasä und Schtüüdijüzzär heint daa abär niggs z süächä kä. So het mä schich bewaffnät und ischt looszogä mit Heuw- und Büuwgablä, mit Säissä und Dreschpfleglä, mit Chneblä und Häärfälgabär, inär Absicht, di Ruer z schliässä und so das Tier im ä Chreis in d Enggi z triibä. D Fröuwä heind daadärbii än ganz schpezielli Üfgab kä: Sobaald däri Bärä in d Neeji ischt cho, heint sch mit lüttäm Gschrei, Schpet-takäl, Ghöör, Gräär und Ggiis än derar-tigi Schand väraschtaaltät, dass das

Tier ab dem Krach fascht mee Angscht het miässä hä als vor dä Ggwerr vo dä bewaffnätä Mannä. Wa düä däri Chreis immär enggär ischt cho, heint sch das Tier ärschossä. Di letschtä Ruer im Goms sjää 1876 gsii. Di Gschichtä vo dä Bärä sint bis hitä im Gedächtnis blibä, wiä di zwei folgändä Begäbäheitä zeichänt.

Ds Gschichggji vo dä Bäräfrässär

As sjää schiints einä vo dä letschtä Bärä gsii, wa i nä Gägänd vo Reckigä/Minschtär schiis Uwäsä het tribä. Minschtigär und Reckigär heint schich üffgmacht zur Jagt und uff beidä Sitä gfreutet mä schich scho uf ä nä guschtigä Bäräbraatä. Schliessli is abär dä Minschtigär ggraatä, däri Bärä z värvitschä. As het düä friili äs groossaartigs Fäscht ggä im Deerfji, ma het ghudlät und prassät, ggässä und trüüchä, plagiert und glachchät. D Reckigär sint di ärteipptä Värläärägsii. In irär Bsazzti heint sch äs Ross gmezzgät, heint s äs gschintät und anschtatt än Bäräbraatä ds aalt-Rossfleisch gsottä. So sind die Minschtigär zu iräm Ubärnamä «Bäräfrässär» cho und us booshaftär Schadä-freid het mä dä Reckigär vo daa äwäg däri Namä «Rosschintini» aagheicht.

Ds Gschichggji vo däri Bäräschlüächt

Än Püür va Reckigä het äs üssärgwennli chräftigs und robuschts Zugrinnärli kä. Das het är im Summär, we grüusam beeschi Arbeitä sind aagschtannä, va däri Hobachälpä ggreicht. Sobaald alls ischt ärledigäts gsii, het är s bis zu dä Sichtadlä, schattähalb ubär am Dorf-rand vo Reckigä tribä, va wa üs das hötgsciidi Tier däri Wäg ämbrüff zum Senntum sälbär gfunnä het. Eis Taggsch abär heint d Hirtä la wissä, das Rind sjää nit uff Hobach aacho. Där Püür, in grossär Angscht, ischt loszogä und het schich uff d Süäch gmacht – däri Alpwäg ämbrüff durch ds Äbilöb. Daa, plezzli ärlickt är sältsami Schpuurä und Tritt im Chrüt näbä däm Wäg. Denä Leisä geit är hinnäna naa, d Schlüächt därdir ämbri und zunärscht am Hobachji finnt är schiis Rinnärli, vo Figgsch halb zärfrässäts und nit wit därnäbät ö äsoo züägrichtät ä Chnissäl vo mä Bärä. Äs ischt schoo än gschpässigi Gschicht, abär ooni Zwiifä: Däri Bärä het das Rinnärli aggriffä, im ä gnaadäloosä Kampf heint schlussendli beidi ä Lezzi und leidi Fläri abbärcho und sind värwunnät bis ämbri ans Löuwibachji troolät.

Und dischär Schlüächt het mä däri Namä «Bäräschlüächt» ggä und ärinnä-rät so nu hitä an di unglöblich schpek-takuläri Gschicht.

SCHWEERI WEERTER

Aabäsizz m: Abendtreffen
ämbrüf: hinauf

ärlikkä: sichten, sehen

ärteippe: zornig werden

Bäräfrässär m: Bärfleisch-esser

Bäräschlüächt w: Bären-schlucht

Bsazzti w: Niedergeschlä-genheit, Ärger, Betroffenheit

Bullärä w: Frischkäse in Ball-form (vom Käser geformt)

Büuwgablä Mz w: Mist-gabeln

Chnebl m: Holzstück, Keule

Chnissel: Ungetüm, Riesen-körper

Fiezi w: uf der Fiezi sii: unter-wegs sein, gesichtet sein

Figgsch w: Füchse

Flärä w: Wunden, Schürfungen

Ggräär s: Geschrei

Ggiis s: Geheul

grüusam: sehr

gschpässig: eigenartig

hitä: heute

Hosäschissär Mz w: Ängst-licher

hötgschiid: sehr gescheit

huddlä: übertrieben feiern

Leisä w: Spuren

Leo m: Leo Lagger

Lezzi w: Verletzung

Loschii w: Unterkunft

lose: hören

Märi w: Grossmenge

Minschter: Münster

Neeji w: Nähe

prassä: gross leben, prassen

Reckigä: Reckingen

reichä: holen

Robä w: zügeln

Rossschinti s: Pferdehäuter

Ruer w: Treibjagd

Ruppä w: Holzspäne (zum Feuermachen)

Säissä Mz w: Sensen

Schand w: Lärm oder Krach

schattähalb: linke Talseite des Goms

schintä: häuten

Schüüdijüzzär Mz w:

Schwächlinge, Prahler

WB,

11.12.2020/2

Senntum: Gemeinschaftsalpe
sijä: sei (Konjunktiv)
Tannäpüss m: Kleintanne
troolä: rollen
Üärlichä: Ulrichen
Ubärnämä m: Spitzname
Üsfaart w: Aussenorte wie Weiler, Alpen
värwitschä: erwischen
värwunnä: verwunden
zegär: schlechter
Zelleta w: Erzählung
Zigersüüsi w: Vollmilch und Frischziger
Zugrinnärlí s: Rind, zieht den Pflug, den Wagen

Äs Tannäbomji

Ob äm Doorf ämbrüf am Rand vom Waald
Daa, wa sit Wuchä baald ä Märi Schnee scho lit
gfroorni Tagä, windig, fiächt und iischig chaalt
Winter is, Dezembär und äs rickt di Wienächtszit.
Zwischät Lärchä, Tannä wa scho gwiss sit tüüsrig Jaar
so hooch wiä unnäna im Doorf där Chirchätrü
ds Taal heint bschizzt vor Rufinä, vo Löuwwägfaar
däm Grimslär trozzänt und däm Weschtwindschtrü.
Daa lüägt där Schpizz vom ä chliinä Tannäpüss gwunnrig us äm Schnee
trömt vor warmä Schtubä, vo Päärlä, Glizzär und vor Määrlifee
vo Bisgwii, Gscheichini, vo Chindärögägglanz im Cherzäschii
und wellti doch so gäärä,
ö ämaal äs Wienächtsbomji sii.

ESOO SÄGE WIER

«Ä hibschi Triichja ischt no kei scheeni Chüo»

Wallisser Schprichwoort

Wörtlich übersetzt, heisst dies: Eine schöne Glocke ist noch keine wertvolle Kuh. Äusserer Schmuck sagt noch wenig über eine Person aus.

ESOO WEERI S RÄCHT GSI

Jaa, was biditet das uf Güettitsch?

1. pirrfju: Dies bedeutet «stossen, anstossen»: Är tüot mi züo pirrfju: Er stösst mich immer..

2. Piitlrieja/Piitlräju: So nannte man ein Festtagsbrot aus besonders feinem Mehl, das «gepiitlot», d.h. fein gesiebt und von Kleie befreit war. Rieja enthielt Erstmilch, Feinmehl, Salz.

Und wie seit me fer das uf Wallisertitsch?

1. Wort: Zugriemen am Pflug: Er wurde «Silo» genannt.
2. Wort: Geräuschvoll, langsam, wenig trinken/schlürfen: Hierfür gibt es verschiedene Wortformen: supfülu, sirpfolu (Visperterminen), siffillu/sipfu, siffilju: Geräusch kann auch beim Einlöffeln entstehen.

EPPIS NIWWS FER Z RAATU

Wie seit me fer das?

Was biditet uf Güöttisch:

- 1. Wort:** Laschtigbutti?
- 2. Wort:** Zändschiisser?

Wie seit me uf Wallisertitsch fer:

- 1. Wort:** sich vereinnahmen lassen?
- 2. Wort:** streiten?

UND EWWERS GSCHICHTJI

Schribet öü!
Wenn ler en Erinnrig us Ewwem Läbe, es Erläbnis, es Gschichtji, e Zellätu oder e Sag, es Schprichwoort, Wizza, es Gidicht oder suscht eppis wisst, waa ler kännet und waa öü fer andri intressant wääri, so schribet iisch. Wier hätti Platz fer Ewwer Biitrag. ler chennt öü in Handschrift schribu. Es sellti appa bis 80 Zille sii – mit dem Computer z.B. anderthalb Schribmasch-schiinesite Arial 12 Punkt. Wier tie d Handschrift de schoo in de Komputer dri. D Adräss heisst:

Iischi Schprach
Neuweg 2
3902 Brig-Glis
alois.grichting@gmail.com

Und vergässet nit, es Foto va Eww derzüe z tue, dass mu di, wa schribunt, öü gseet. Gäbet öü, wenn ler heit, zwei Foto oder Abbildige, waa z Ewwem Text passunt! Wier chänne de öü Foto derzüe und va Eww sälber cho machchu. Danke no fer intressanti Weerter, Schprichweerter und Rede-wendige! Alle vill Chraft und Giduld in discher immer no nit vergangnu Virus-Zit! Alls Güeta! Heit zämmu!

Alois Grichting

WB,
11.12.2020/3